

VENDIM
Nr. 201, datë 6.4.2022

**PËR KUSHTET, KRITERET DHE AFATET PËR PËRCAKTIMIN E
PROCEDURËS SË PËRSHPEJTUAR PËR SHQYRTIMIN E KËRKESËS PËR
MBROJTJE NDËRKOMBËTARE**

Në mbështetje të nenit 100 të Kushtetutës dhe të pikës 5, të nenit 34, të ligjit nr. 10/2021, “Për azilin në Republikën e Shqipërisë”, me propozimin e ministrit të Brendshëm, Këshilli i Ministrave

VENDOSI:

1. Procedura e përshpejtuar për shqyrtimin e kërkesës për mbrojtje ndërkombëtare zbatohet nga autoriteti përgjegjës për azilin dhe refugjatët, në rastet kur kërkuesi plotëson një prej kushteve të mëposhtme:

a) Në momentin e paraqitjes së kërkesës dhe të fakteve përkatëse ka ngritur vetëm çështje, që nuk janë të lidhura me shqyrtimin, nëse ai kualifikohet si përfitues i mbrojtjes ndërkombëtare, në përputhje me ligjin nr. 10/2021, “Për azilin në Republikën e Shqipërisë”;

b) Vjen nga një shtet i sigurt i origjinës, sipas përcaktimit të bërë në ligjin e azilit;

c) Ka mashtruar autoritetet duke paraqitur informacione apo dokumente të rreme ose duke fshehur informacione apo dokumente, në lidhje me identitetin dhe/ose kombësinë e tij, të cilat mund të kishin ndikim negativ në vendim;

ç) Ka mundësi, që me dashje të ketë shkatërruar ose asgjësuar dokumentet e identifikimit apo të udhëtimit, të cilat do të ndihmonin në përcaktimin e identitetit dhe/ose të kombësisë së tij;

d) Ka bërë deklaratatë të paqëndrueshme dhe kontradiktore, qartazi të rreme ose dukshëm të paqëndrueshme, të cilat bien ndesh me informacionet e vërtetuara të shtetit të origjinës, duke rezultuar qartë në pretendime jobindëse, në lidhje me faktin, nëse kualifikohet si përfitues i mbrojtjes ndërkombëtare, në kuptim të ligjit për azilin;

dh) Ka bërë kërkesën vetëm për të vonuar apo penguar zbatimin e një vendimi të mëparshëm ose një vendim të pritshëm, i cili do të rezultonte në largimin e tij;

e) Ka hyrë në mënyrë të paligjshme në territorin e vendit dhe pa një arsye të vlefshme nuk është paraqitur tek autoritetet përgjegjëse apo nuk ka dorëzuar kërkesën për mbrojtje ndërkombëtare sa më shpejt të jetë e mundur;

ë) Refuzon të përmbushë detyrimin për marrjen e gjurmëve të gishtërinjve;

f) Konsiderohet rrezik për sigurinë kombëtare ose rendin publik të Republikës së Shqipërisë;

g) Ka paraqitur një kërkesë tjetër për mbrojtje ndërkombëtare, që nuk është e pranueshme sipas nenit 35, të këtij ligji.

2. Gjatë procedurës së përshpejtuar, shqyrtimi i kërkesave për mbrojtje ndërkombëtare realizohet duke respektuar parimet dhe garancitë themelore procedurale.

3. Shqyrtimi i kërkesave për mbrojtje ndërkombëtare nëpërmjet procedurës së përshpejtuar do të zhvillohet nëpërmjet një procedurë të drejtë dhe efikase mbi baza individuale. Autoriteti përgjegjës për azilin dhe refugjatët do të realizojë një vlerësim material të kërkesës, duke shkurtuar afatet kohore të përfundimit të procesit të regjistrimit, intervistimit dhe vendimit.

4. Në përfundim të procedurës së përshpejtuar, autoriteti përgjegjës për azilin dhe refugjatët merr të njëjtat vendime, bazuar te të njëjtat parime si te procedura e zakonshme, konkretisht:

a) njeh statusin e refugjatit;

b) refuzon statusin e refugjatit dhe njeh statusin e mbrojtjes plotësuese;

c) refuzon kërkesën për mbrojtje ndërkombëtare;

ç) pushon shqyrtimin e kërkesës për mbrojtje ndërkombëtare;

d) ndërpret procedurën për përcaktimin e statusit të mbrojtjes ndërkombëtare.

5. Afati për përfundimin e procedurës së përshpejtuar nga autoriteti përgjegjës për azilin dhe refugjatët është 15 (pesëmbëdhjetë) ditë kalendarike nga paraqitja e kërkesës për mbrojtje ndërkombëtare.

6. Pavarësisht llojit të vendimit që merret në procedurën e përshpejtuar, kërkuessit të mbrojtjes ndërkombëtare i garantohet zgjidhje e efektshme ligjore, në përputhje me nenin 22, të ligjit për azilin.

7. Ngarkohen Ministria e Brendshme, autoriteti përgjegjës për azilin dhe refugjatët, Drejtoria për Kufirin dhe Migracionin, për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTËR
Edi Rama